

Eqqumiitsuliornerup inuussutissarsiutitut, siunissamilu nunatsinni, nunattalu avataani niivernikkut tunisassiatut, nunattalu avammut nittarsaaneqarneranut iluaqutaanerulersinneqarnissaa, oqilisaavagineqarnerulernissaallu pillugu qanoq ililluta suliniuteqarsinnaanerput pillugu apeqquteqaat aallaavigalugu oqallisissiassatut siunnersuut

(Inatsisartunut ilaasortaq Peter Olsen, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Naalakkersuisut Inatsisartunut ilaasortaq Peter Olsen, Inuit Ataqatigiit, qutsavigaat apeqquteqaat aallaavigalugu oqallitsitsinissamut siunnersuutaa pillugu.

Naalakkersuisut sinnerlugit siunnersuut akissuteqarfingissavara.

Ilumoorpoq eqqumiitsuliornikkut ingerlatsivinni assiginngiaartuni tamani pikkorissunik amerlasuunillu eqqumiitsuliortoqarmat. Eqqumiitsuliorneq nunatsinni pisuussutigaarpus sunniutaa minnertut takorloorneqartartoq. Pissutsinut amerlasuunut sunniuteqartuartarsimavoq, angakkup tupilliaanit qalipaasup misigissutsiminik qalipaanermigut ersersitsineranut. Inuimmi uagut eqqumiitsuliornermi eqqumiitsulianilu tarrarsortarpugullusoq, inuiannullu allanut kinaassuserput takutittarlugu, aamma Kalaallit Nunaata sunik imaqrnera.

Aningaasanut inatsimmi 2017-imoortumi Eqqumiitsuliornermut Kulturimullu tapiissutinik immikkoortitsinikuuvugut, Eqqumiitsuliornermik ingerlatsineq pillugu Inatsisartut inatsisaat 2016-imeersoq kiisalu Kulturikkut ingerlatsineq sunngiffimmilu sammisassaqtitsineq pillugit Inatsisartut inatsisaat 2016-imeersoq tunngavigalugit. Inatsisit taakkua nipilersortartut, filmiliortartut, atuakkiortut aamma allatigut eqqumiitsuliornermik suliaqartut amerlanertigullu eqqumiitsuliornerminnik inuussutissarsiuteqartut, periarfissaqartippaat suliniutiminnt ingerlatsinerminnullu atatillugu tapiiffingineqarnissaminnik qinnuteqarsinnaanerannut.

Kulturikkut ingerlatsinernut tapiissuteqartarnermik aaqqissuussinerit assiginngitsut aammalu Tipsernermi Lottorermillu aningaasaliissutaasartut aqutigalugit tapiissuteqartoqarsinnaavoq isumassarsianik ineriartortitsinernut aamma suliniutinik aallartitsinernut, aamma misileraanerusinnaasunut, kiisalu ingerlatanut namminernut. Aningaasaliissutinik taakkunangtaapiissutaasartut aamma allanit tapiissutaasinnaasut atorlugit eqqumiitsuliorut kulturikkullu ingerlatsisut eqqumiitsuliaminnik, isiginnaartitsissutissaminnik allatigulluunniit kulturikkut suliaminnik ineriartortitsisarput.

Alloriarnerlu tulleq tassaasarpoq eqqumiitsuliortup suliaminik pitsaanerpaamik tuniniaanissaa, qalipakkani, erinarsuusiani il.il. tunisinnaajumallugu, aammalu nunatta avataanut suliaminik tunisaqartartunut ilaalerumalluni.

Kattuffik Kalaallit Atuakkiortut ukioq manna avammut tunisisinnaanermik ajornartorsiuq qaqinnikuuat, tassani ilaatigut Greenlit-imik nunat avannarlerneersup Nordlit-imik isumassarsiorfiusumik, avammut tunisassiorfusumik ukkataqartussamik pilersitsisinnaanermik isumassarsiorfiusoq.

Assassornermik eqqumiitsuliortut, isiginnaartitsisartut, nipliersortartut eqqumiitsulioriaatsinilu assigiinngitsuni eqqumiitsuliortut, pikkorissaasut aqqutigalugit pikkorissarsinnaassapput, eqqumiitsulianik tunisassiorfusumik eqqumiitsuliornermillu suliffeqarneq inerisarlugu inuutissarsiutigisinnanngorlugu. Nunanittaq allani aallartitat aallartitaqarfiillu suleqatigineqarsinnaapput eqqumiitsulianik sulianik avammut niuernermi.

Filmilornerup iluani sinaakkutissanik filmilornermik suliaqarfissamik pilersitsiniartoqarpoq, sulianik inerisaavissatut atugassamik.

Tassungalu atatillugu ilaatigut eqqaaneqarsinnaavoq, nunarsuarmiut niuerfiannut periarfissanik misiliinissaq kissaatigigaanni, assersuutigalugu filmiliamut tunngasumik, aqutsinikkut aaqqissuusseriaatsit assigiinngitsut atorneqartarpuit. Assersuutigalugu Island ukiuni kingulliunerusuni iluatsitsilluartalerpoq filmiliorniartunik Islandimi immiussinissamut soqutiginnilersitsisarluni. Tamanna tikikkuminassutsip iluaqutigineqarneranik aningaasatigullu kajumissaatitut aaqqissuussinernik tunngaveqarpoq, filmilornermik ingerlatseqatigiiffinnut aningaasarsiornikkut iluaqutissanik aaqqissuussisarnikkut, ilaatigut akitsummik momsimik assigisaanillu akiliutaasartunik utertitsisarnikkut. Taamaattumik isumaliutigineqarsinnaavoq assingusunik aaqqissuussinernik nunatsinni pilersitsinissaq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik aamma Aningaasaqarnermut Akileraartarnermullu Naalakkersuisoqarfik paasissutissanik aallerfiginikuuai, eqqumiitsuliornermik inuussutissarsiornermut periarfissaanik.

Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfimmiit eqqaaneqarpoq ukiuni makkunani eqqumiitsuliornermik inuussutissarsiuteqarneq ineriertormat. Ingammik ilusilersuinerme aamma atortussanik kusanartuliornermi nutaanik suliffeqarfinnik pissanganartunik pilersinneqartartunik takusaleratta. Naalakkersuisut inuussutissarsiornikkut siuarsaaniarluni aaqqissuussinerit imatut sularisimavaat, periarfissaalersillugu inuussutissarsiutinik siuarsaanissamut aningaasaliissuteqarsinnaaneq, aallarnisaasunut nutaanut aamma suliffeqarfinnut, niuernerminnik nioqqtissiat nutaat aqqutigalugit annertusaaniartunut. Inuussutissarsiutinik siuarsaaniarlunkut aningaasaliissutit aqunneqarput Namminersorlutik Oqartussat siuarsaanissamut ingerlatseqatigiiffiutaannut Greenland Businessmit. Naalakkersuisut aamma aallarnisaasunut ikorsiisarnermik aaqqissuussinernik pilersitsisimapput, aallarnisaasunut siunnersuisarnermik suliffeqarfinnut aallarterlaanut aamma suliffeqarfinnut

annertusiartortitsillutik ineriertortunut sammisitaasumik. Aallarnisaasunut siunnersuisarnermi aamma avammut niuernermut siunnersuineq ilaavoq. Ilanngullugulu eqqaaneqassaaq eqqumiitsuliortutut inuussutissarsiutillit inuussutissarsiutillit allatulli aaqqissuussinernik tamakkuningga iluaquteqarsinnaammata.

Aningaasaqarnermut Akileraartarnermullu Naalakkersuisoqarfius ilisimatitsissutigaa akileraartarnerup iluani aaqqissuussinernik assigiinngitsunik maanna peqareermat. Eqqumiitsuliortunuinnaanngitsoq, kisiannili nunatsinni inuussutissarsiortunut pikkorissunut tamanut sammititaasunik. Eqqumiitsuliortortagut pikkorissut ilaatigut iluaquteqarsinnaapput nalikilliliisarnermik aamma ilanngaateqartarnernik aaqqissuussinernik, assersuutigalugu eqqumiitsuliornermut atortussaminnut aningaasaliisarnerminni aamma ilinniaqqinnissamut pikkorissarnissamullu aningaasaliisarnerminni. Ilanngullugulu oqaatigineqassaaq Akileraartarnermut Aqutsisoqarfik piareersimammat qarasaasiatigut attaveqaatit atorlugit aammali oqarasuaatikkut nammineerlunilu saaffiginninnikkut ilitsersuisarnissamut, aammalu Akileraartarnermut Aqutsisoqarfik ulluinnarni ilitsersuisarmat nunatsinni innuttaasunut, tamatumani aamma eqqumiitsuliortunut.

Naalakkersuisuniit taamatut oqaaseqarluta oqallilluarnissaq qilanaaraarput.